

PILIMON

Ini Sa Igsulat I Pabelo Diyà Si Pilimon

Ini Denu Sa Igsulat I Pabelo Diyà Si Pilimon

Si Pilimon sa maama kedu diyà sa menuwa Kolosas. Iya sa pesuwan di migpigtuu diyà si Hesus Kelistu enù ka dinineg di sa ketegudon i Pabelo. Edung sa egoh di migpigtuu, tigtu egseloyukay da si Pabelo.

Duen sa udipen i Pilimon pinengadanan si Onésimo. Sebaen agdaw migpelaguy Onésimo i eg-angay dutu menuwa Loma dò. Ligò di diyà menuwa Loma, netelabuk di si Pabelo owoy tinulù i Pabelo kagdi. Agulé migpigtuu dé diyà si Hesus Kelistu, owoy egtabangan di Pabelo i diyà sa bilangguwan.

Danà i Onésimo migpigtuu dé diyà si Hesus, endà mepion di amuk endà pelikù di diyà sa kaunutan di. Egoh iya, amuk epgangunutan da sa uledin gubilenu, tigtu mepigtamayan sa udipen migpelaguy kedu diyà sa ulu-ulu di. Huenan di, igsulat i Pabelo ini i diyà si Pilimon anì ipeuloy di sa salà i Onésimo anì saluan di kagdi lagà sa tigtu duma di enù ka egsetelehadiyay da dé danà da epgigtuu diyà si Hesus Kelistu.

Ini Sa Edungan Kagi I Pabelo Diyà Si Pilimon

1Na, si Pabelo a egsulat ini i owoy si Timotiyu, sa duma ta epgigtuu. Nebilanggu a danà sa keunut ku si Hesus Kelistu. Egsulat ké diyà keniko, Pilimon, enù ka kuna sa duma ké tegegalebek eghiduwan ké.
2Egsulat ké ma diyà keniko, Apiya, enù ka kuna sa tebay ké danà sa kepigtuu ko, owoy diyà keniko ma, Alikipo, enù ka kuna sa duma ké eg-unut diyà si Datù lagà sundalu di. Egsulat ké

ma diyà sa umpungan i Hesus diyà sa dalesan ko.

3Egsimbà ké anì mekehaa yu sa mepion ketabang ipeuloy i Nemula owoy sa melanih keugpà yu danà sa Emà ta si Nemula owoy si Datù Hesus Kelistu.

Ini Sa Egoh I Pabelo Eg-olò Sa Kepigtuu I Pilimon

4Na, Akay, uman a egsimbà keniko, takà a egpesalamat diyà si Nemula, 5enù ka dinineg ku sa kehidu ko diyà sa langun

etaw i Nemula owoy sa
kepigtuu ko diyà si Datù Hésus.
6Isimbà ku kuna anì lumenuk sa
ketiigan ko denu sa langun
mepion igbegay i Kelistu diyà
kenita i etaw di danà sa
kepigtuu ta nesesebaen.
7Neanggan a temù owoy
metanà ma sa pedu ku danà sa
kehidu ko, o loyuk ku epgigtuu,
enù ka migkepion dé pedu sa
langun etaw i Nemula danà ko.

**Egpegeni Pabelo I Sa Kepasinsiya
I Pilimon Diyà Si Onésimo**

8Na, danà sa dakel kehidu
ko, endà duen pedu ku egsasà
keniko sa mepion baelan ko.
Apiya di pa dakel sa egkegaga
ku igbegay i Kelistu, endà doo
egsuguen ku duu kuna. **9**Dodoo
danà sa kehidu ku keniko,
egpegeni a polo diyà keniko.
Apiya di pa aken si Pabelo sa
lukes maama owoy nebilanggu
a ma danà ku eg-unut-unut diyà
si Hésus Kelistu, egpegeni a daa
diyà keniko. **10**Duen sa
egpegenien ku diyà keniko
denu si Onésimo, sa udipen ko.
Kagdi lagà sa anak ku enù ka
egpeemà a kenagdi danà sa
kepigtuu di egoh ku nebilanggu
dahini. **11**Egoh anay endà duen
lagà di diyà sa kehaa ko, dodoo
ini egoh di tigtu mapulù dé diyà
sa kehaa ko owoy diyà sa naken
ma kehaa.

12Na, ini egoh di ipelikù ku
kagdi diyà keniko, owoy lagà sa
lawa ku ma eglikù diyà keniko

enù ka igopusung ku kagdi i.
13Ungayà ku muman pa mugpà
hedem diyà kenak lagà sa
sinaligan ko tumabang kenak
egoh ku pelà nebilanggu danà
sa ketulù ku sa Mepion
Tegudon. **14**Dodoo, endà duen
pedu ku pelà egpeugpà kenagdi
dahini enù ka endà pa dinineg
ku duu amuk pandayaen ko.
Ungayà ku danà sa niko pedu
polo sa mepion baelan ko,
beken danà ku egtegel keniko.

15Na, iya kéen sa pesuwan di
nelugaylugay nekedan Onésimo
i diyà keniko anì pelikù dema
diyà keniko taman melugay.
16Edung ini egoh di beken dé
udipen ko daa, dodoo uman pa
mapulù diyà sa udipen enù ka
kagdi dé sa duma ta epgigtuu
egkehiduwan ta. Tigtu dakel
kagdi i diyà sa pedu ku, labi pa
diyà keniko, enù ka beken danà
di udipen ko daa dodoo danà di
ma duma ta epgigtuu diyà si
Datù.

17Na, diyà sa kehaa ko, amuk
aken sa tigtu loyuk ko danà ta
egpigtuu, adati ko kagdi lagà
mendaan sa keadat ko kenak.
18Amuk nesalà diyà keniko
ataw ka duen utang di, aken pa
sa metiig. **19**Na, aken si Pabelo
egsulat ini i guwaen ku,
bayadan ku sa utang di. Dodoo
yaka ma egkelipeng duu sa
dakel utang ko diyà kenak,
taman sa suguy ko ma danà ku
migpepigtuu keniko. **20**Huenan
di, o loyuk ku epgigtuu, hiduwi

ko aken, hih, danà ta etaw i Datù. Petuu ko sa ungayà ku anì anggan ko sa pedu ku, enù ka setelehadiyay ki danà ta egpigtuu diyà si Kelistu.

21Na, egoh ku egsulat ini i, netiigan ku doo kesaligan ka egpangunut diyà sa pinegeni ku keniko, owoy lumowon ma doo sa mepion baelan ko diyà sa inikagi ku. 22Na, ligò ko egpangunut, tapay ko ma sa kenà ku mugpà diyà keniyu, enù ka iya sa antap ku melengaan a owoy mekeangay a ma diyà keniyu danà sa kesimbà yu kenak.

**Ini Sa Sabuhanan Kagi I Pabelo
Diyà Si Pilimon**

23Na, si Ipapalas, sa duma ku nebilanggu danà sa keunut di diyà si Hésus Kelistu, ipetulon di sa mepion pedu di diyà keniko. 24Hediya ma, egpetulon ma sa medoo duma ku egbulig kenak dahini, si Malkos owoy si Alistalko owoy si Dimas owoy si Lukas.

25Egsimbà a anì mekehaa yu langun sa mepion ketabang ipeuloy i Datù Hésus Kelistu.

Na, taman iya daa sa kagi ku.
Si Pabelo